

民國新脩合川縣志

卷之



掌錄四

民國新修合川縣志卷之十五

邑人李昌運學

征權

關市之賦載在周禮卽征權所自昉也厥後齊權鹽鐵漢權酤唐權茶額漸廣課亦漸增四川古稱天府蜀道之難難於上青天操奇贏者不於其途況兵燹而後地廣人稀土箸者十之一二三楚居民往耕其地自爲村落以耕爲業不習有無貿遷欲其擊轂摩肩商賈濟濟充國用得乎此夔關視天下各關爲後渝關尤後胡林翼曰世亂軍興百稅竝舉合川之征權有加無已亦勢也情也雖然國家取之於商商賈取之於民牧羊者歲嘗兩翦其毛今牧人日翦其毛以獻主人悅其毛多而羊無以避寒死而且盡今日之有加無已是亦日翦其毛也不念其寒且不計其死也況翦而不獻者作征權掌錄

清時禁革明季加增稅額直省州縣零星抽取落地稅名色概行嚴禁征權之政一歸肅如康熙二年嚴禁各關違例收稅及遲延措勒之弊

奉諭旨各省鈔關之設原期通商利民以資國用近聞各處收稅官巧立名色另立戥秤於定額之外恣意多索或指稱漏稅挾詐過往商民或將民間日用瑣細之物及衣服等類原不抽稅者亦違例抽稅或商民已經報稅不令過關故意遲延措索遂其貪心弊端甚多難以枚舉嗣後凡地方收稅官員俱著洗心滌慮恪遵法紀如有前項情弊在內科道在外督撫嚴查參究從重治罪如督撫不行參奏別經首發卽治該督撫以徇縱之罪

皇朝文獻通考

慎重征商備載列朝其取於商民者卽如

鹽課順治六年免四川鹽課以四川未定免徵鹽課從巡撫趙班璽請也十七年准巡按張所志奏蜀省之鹽皆產於井必相山尋穴鑿石求泉而并始成開鑿艱難每開一井常費中人之產應照開荒事例三年起課以廣招徠新鑿鹽井仍令每年報部武弁抽索竈丁應申飭違者題參重處貧民易食鹽斤應令四十斤以下准免課稅四十斤以上者仍令納課從之

同

康熙六年巡撫張德地奉行查議大引一款隨備移

鹽道札飭各縣會議旋据鹽法道稟稱据潼川州面稟稱蜀省戶口寥寥非期之百餘年之後斷無生聚驟蕃之理況鹽井盡爲賊塹開淘原

不易祇此小票聽民自領自賣頗爲簡便若額定每縣行鹽若干派引幾許反致行鹽無民歲課有虧其大引應俟地方蕃庶之日再爲頒領又據嘉定州稟稱據犍爲縣面稟稱兵燹之後舊案無存萬歷年間大引行鹽之例難以稽查目今犍爲填票行鹽者不過開復之始權爲便商計也第川商難比他省卽今日之水票五十包尙難填給誠恐大引舉行反有未便於擔夫小販也等情到州該卑州查看得地方初定民稀財窮節年俱小販行鹽或借本或合本不過數百觔而已俱討小票負運駝載取其就便本少利捷希圖快便以省僱船僱夫之費是民朝夕養命者恃有小票且小票招商節年奉發之數尙已難消茲欲舉行大引恐大引未行而小票亦停所誤鹽稅民生不小合無暫行權宜稍俟生聚再行大引又忠州重慶府保寧府云云移覆等因到司該本司查看得鹽政爲國課重務引票爲鹽法紀綱此議設大引誠內部剔弊實而專考成之善策也但地方有荒熟之不同立法有經權之各異查蜀省鹽引舊例每引正鹽二萬三千觔今自獻逆屠戮之後不惟無昔日蕃盛時之竈戶堆積盈餘亦且無巨航大艦與水手橈夫可供挽拽

甚且無昔日之湊集煙民可銷多鹽是卽有富商大賈亦無所用其資本此所以從前不得不因時變通而爲五十包之水引及每票四包之旱引也今若一旦改設大引則小商無一引之資窮竈無一引之貨勢必商竈俱困課稅交虧此產鹽各屬及鹽法道俱諄諄以大引難行爲請也至於內部考成稽察遞年新淘井眼及徵收稅糧俱有冊報而奉撥充餉又復於兵餉冊內奏消是稽察考成又不在大引之設與不設也今准該道查議移覆前來事關國課民生伏候本院具題等因到臣據此該臣看得蜀省凋敝之後商民物力有限難行大引緣由先經臣咨部在案部臣以蜀省雖稱大引難行止憑在外給票行鹽無考成稽核行臣速議具題臣隨行據署布政司李翀霄詳稱大引舊例正鹽二萬三千觔祇緣川中無昔時繁盛竈戶亦無湊集商民是以因時通變填給水旱小票以便通其商竈今若驟改大引不惟零星小販旣無一引之資卽寥寥竈戶又無一引之貨勢必商竈俱困而課稅交虧至於稽核考成則遞年開淘井眼與行票徵收稅銀按年造冊報部撥充兵餉於年終入冊報銷卽可以此稽核考成也等因理合具題伏乞皇上

睿鑑勅部議施行

黃廷桂四  
川通志

五十三年准川鹽加增引額戶部議覆四

川巡撫年羹堯疏言成都所屬犍爲等七州縣竈民請增水陸鹽引一

千一百四十五張徵稅銀七百三十兩有奇於康熙五十三年爲始徵

收以便民食應如所請從之雍正八年定川省鹽引行銷分別納課例

奉諭旨川省鹽課考成惟責之產鹽州縣其餘竝無巡查之責且有僻

遠地方不行官引以致私販充塞甚爲鹽政之弊應將官引通行各省

約計州縣戶口之多寡均勻分發引張令其各自招商轉運倘有壅滯

責成各州縣定爲考成如此則有司等自必加意查察使私販息而官

引銷弊端釐剔矣著督撫詳議具奏經四川督撫覆奏稱川省州縣如

簡州閬中等三十九州縣均係產鹽地方原無引目分發各州縣招商

辦運應將各州縣應銷引目計算戶口另請增給責令竈戶照商人一

例行銷辦理至所產鹽不敷民食之處亦令計算戶口分認別州縣招

商引運其不產鹽之成都華陽等州縣廳衛共九十九處均令分認引

目招商運銷又疏稱僻遠州縣如松潘衛南江縣儀隴建始四處或道

途遙遠或治設山僻路途崎嶇人民殷處招商不易因而鹽價高昂貪

利奸徒乘機興販應令地方官查明戶口約計食鹽配引凡一村一莊配發引目招商轉運接濟民食至州縣考成既經分引行鹽倘官引壅滯或課稅未能全完以及招商遲延私販發覺均仍照舊例處分又據稱甯遠一府係新設府治查所屬之西昌會理冕甯鹽源越嶲德昌迷易鹽中等州縣衛所俱食鹽源縣之鹽今鹽源行銷陸引四百張倘有餘鹽自應查明鹽飭請引行銷查該府所屬八處地方均屬漢番雜處向來引稅俱係就買鹽人民抽收稅課應將引目交與鹽源縣令該縣典史駐劄白鹽井地方仍於各屬居民買鹽時抽稅又據稱川鹽有例行黔省之貴陽安順平越都勻思南石阡大定威靈并改黔省之遵義滇省之鎮雄烏蒙等十一府州縣及川省之西陽石砭明正木坪瓦寺金川阿日雜谷九姓等土司竝新改設之黃螂雷波等處發賣者從前引目竝未帶往各省及土司等處地方葢因途路遙阻商人不能前進皆係沿途州縣截角掛驗彼處商人轉運該地方截角州縣換給照票以爲前途盤驗之據今請將應行黔滇兩省及土司竝新設之黃螂雷波等處鹽飭行令該督撫核明水陸引張確數照例刊刻雙聯引根引

紙鈐蓋鹽道印信分發沿邊州縣俟商人運鹽到日該州縣照部引字

號張數填註引根引紙於中大書鹽勛數目以引紙截給鹽商照例截

角放行其引根飭令該州縣俟鹽勛運銷完日同部引申送鹽道查核

銷繳得旨允行

皇朝文獻通考鹽

定例商之徵責之鹽運使鹽道引之行責之

州縣官水引一張配鹽五十包陸引一張配四包每包重一百六十斤

行引有定案配鹽有定廠雍正朝計口領引每人日食鹽三錢以一年

核算其食鹽六斤十二兩日用必需少則淡食蜀自嘉慶末羨餘積欠

至道光三十年幾於全綱頽廢徹底查核各計商積欠十萬七千有奇

潼商積欠十三萬有奇潼商强行邊引故受累愈深惟成華兩縣計商

及犍富兩廠邊商稍爲殷實所有計商積欠川督分撥代銷統限十二

年完清將潼商額行黔邊水引撤出交犍富兩商運赴黔邊行銷委員

踏勘運道劃清界限至是蜀鹽之法漸密弊全剔矣課之來源在乎引

引之去路在乎銷自咸同間創爲招代改配之說以此岸之商代行彼

岸之引以彼岸之引改配此岸之鹽營私廢公非言語所能形容

鹽道行推

代改配希圖陋規邊商積欠羨銀一百三十六萬

揆厥所由官吏之弊三稅羨商所樂輸也然

國家所重在正供官吏所急在增耗假盤詰名色濟其勒索逢正引則橫征加派遇私販則受賄縱容弊一竈戶鑿井煎鹽刮土淋鹵其苦不可勝言而官吏急於陋規今日星提明日火票否則借題發揮必饜飽而後止弊二鹽艘行數千里其間風掀浪吼者數十處或部引漂沒視爲奇貨甚至家已傾而案猶未絕弊三若商之弊定額每包百六十斤每船十六引乘機夾帶每包三百二十斤是一引加倍也是每船溢十六引也計一商不知溢若干引也計眾商直不知溢幾何引也要之官吏之弊在於病商商人之弊至於病國事有相因所必然者夫商操贏貲以配運欲牟利焉耳而官吏開簽有費截角有費奏銷有費改配有費支放盤驗有費種種誅求不得不鍾其弊於買私鍾其弊於溢斤也然天下行鹽之地食鹽之人各有定數溢者多消者少則鹽必壅舊鹽旣壅新鹽復催則鹽必賤鹽賤而價減價減而商窮商窮而引積引積而課逋矣鹽法補畧合州志載乾隆八年竈戶報開鹽井二口每年權課銀三錢課羨銀三分六釐共銀六錢七分二釐原額食鹽銷蓬溪水引四十張每張徵正稅銀三兩四錢零五釐羨餘四兩四錢六分截角銀六錢

又銷射洪縣水引二百五十七張每張正稅銀三兩四錢零五釐羨餘銀四兩八錢九分五釐截角銀六錢計銀二千六百二十五兩九錢又竈戶新增陸引二十三張每張正稅二錢七分二釐四毫羨餘銀一錢二分七釐截角銀四分八釐計銀十兩二錢九分零四毫在本井配銷以上并課引稅共銀二千六百三十六兩八錢七分六釐解鹽道庫

乃張孚合州志程業修合州志○昌運案寇宗重慶府志合州鹽井一眼權銀三錢水引二百九十七張陸引九張稅銀一千零一十三兩七錢三分七釐只及正稅也黃廷桂通志合州行鹽水引一百零七張此志成於雍正八年適當川鹽分別納課之始所書據八年前云云張乃孚志原額殆據維時招商立店城有店鄉之大場及重要地皆有店設鹽八年定例

關二一大河壩一城外西南涪江岸委員住涪江岸盤驗商運商銷自道光以來鹽商以官爲符擅倚權勢窮奢極欲遂不振巡丁滋擾爲害地方歷任知州如紀大奎李宗沆皆思杜其弊咸豐元年李士彬任合州招募鹽商無人承應集士紳籌議歸丁

詳見公善掌錄鹽課局

稟准官運官銷

地方按糧納課鹽關釐金零商抵關完納同治二年川督駱秉璋奏設鹽垣每斤加釐徵錢四文六年秦隴軍糈有增九年滇黔軍糈又有增光緒五年川督丁寶楨奏辦官運瀘州設總局委候補道大河壩設分

局委候補府十二年設稱鹽所每包點劄徵錢二百四十文作實惠局公款民國元年川省議員鄧孝可力主撤銷引岸之議鹽法大變三年財政部見稅收太絀始呈定新章凡產鹽各廠均得設製鹽公司至邊計濟楚各岸劃定區域分設運鹽公司卽名曰某岸運鹽公司水岸行引每引八千觔按引抽稅陸岸行票每票按觔抽稅所定稅率係於現行等差稅外邊岸每觔加十二文計岸每觔加九文票鹽每觔加六文通以每錢一千六百文作銀一兩改爲銀本位一律徵收現錢並於各廠設立公垣以杜重包夾帶漏私之弊合川所銷引鹽經青隄渡康家渡及新立之潼南縣照章查驗下行船隻驗票蓋章不稍需索其驗鹽船每包以二百觔爲限包繩等項加皮五十觔引外加食鹽二包不在完稅之內鹽運使晏安瀾諭鹽商加稅文曰案查民國三年十月六日奉鹽務署飭開本署具呈陳明四川鹽務組織公司辦法一案於九月十七日奉大總統批令如所擬辦理應卽由該部署轉行遵照此批等因轉行到司本年三月三號奉鹽務署冬電開中央概算支絀萬分專恃鹽款以資補救四川係屬大省前清收款頗鉅軍興以來鹽務廢弛

稅收短絀前據該司擬具組織公司辦法業經本署核定大綱呈准飭知惟因改革鹽法不厭求詳顧問洋員既有磋商故飭司漸緩進行現在財政窘迫川鹺辦法久不解決未免坐失時機本督辦總理鹺綱特決定治標之策既照前次核定公司辦法責成該司妥速進行所有本年收數務須徵復前清三百六十餘萬兩之額毋得稍有短絀此則該司應負其責者也至取消滇黔通過稅法如何並仰詳細籌議擬定辦法詳署核奪等因當經本司核以部電所指之三百六十餘萬兩係照前清時代川省引鹽票鹽全年所收之總額而言現行稅則過輕引票毫無區別此次若祇組織公司而不整理票鹽或雖整理票鹽而不酌量加稅實難徵復三百六十餘萬之舊額自應於各廠設立公垣以爲收買鹽勛轉發商販之所並令與公司同時成立以免參差一面按照現行等差稅參酌前清稅率將滇黔兩省現抽之通過稅及前清歸丁州縣攤入丁銀所抽之鹽釐加價一併攤入邊計票稅款之內通改爲銀本位全收現銀隨將新定稅率立案具詳並以公司公垣開辦在即轉瞬卽須實行電請鹽務署先行核覆現奉鹽務署東電開公司辦法

經該運使籌備成立聞之甚慰已電咨巡按使通飭所屬協助彈壓仍由該運使認真辦理剋日進行等因奉此除派員督催各公司公垣剋期成立並牒請巡按使通飭遵照外合行出示曉諭爲此仰鹽商居民人等一體知悉該商民須知鹽稅已經抵借外債關係國信至爲重要近年稅收短絀過半固由於成法廢弛亦由於減輕稅率豁免歸丁有以致之孟子譏白圭以貊道旨哉言乎今歸丁一項已無庸議若稅率不增何能徵復前清三百六十餘萬之舊額况新定稅率比較均稅辦法每鹽一百觔徵銀二元五角仍屬減少且預計稅額總數比較前清舊額尙短二十餘萬兩不得不清查并電核實秤觔以期化私爲官彌縫其闕此本司維持川鹽之苦心各廠各岸紳商士民所共諒者也嗣後公司商人公垣商販在廠購鹽均應查照後開稅率繳納現銀如願以錢完納應照市價折合購食之家亦須查照核定牌示價值自向本境商店購買毋得妄生異議藉端阻撓致壞鹽法自干咎戾各宜凜遵毋違特示計開射蓬引鹽稅率每引繳銀一百零八兩票鹽稅率射蓬廠花鹽按觔加九釐巴鹽按觔加九釐六毛射廠花鹽按觔加七釐巴

鹽按勛加七釐六毛

潼南縣志

右鹽課

合州之水南與峨眉白芽雅安蒙頂同爲茶之珍品定例凡山鄉宜茶之地土人樹藝爲業古無徵惟商賈轉運而售之民者徵其商曰茶課合之水南非有課也自遠來者課之清代茶課沿於有明攷洪武五年置四川茶鹽都轉司令四川產茶地方每十分官取一分三十年令成都重慶保寧三府及播州宣慰司各置茶倉歲徵川中課茶貯倉召商中買與西番易馬勅戶部差行人一員於陝西河州臨洮四川礪門等處嚴諭把隘頭目不許私茶出境萬曆朝巡撫都御史劉大謨博采茶議天下之事窮則變變則通通則久水塞則決之琴瑟不調則更張之是可以語變通矣變通者權之謂也國初定鼎維州松州河州有茶馬互市馬之資於此者纔千百之十一耳永樂以後騏驎駿騮盡冀北之羣平涼專設憲臣以提督茶馬遼東山西甘州之團牧直隸河南山東之騾種皆材之良而馬之產於南者不復入關於是乎四川茶馬之法壞矣然番人乳酪腥羶之食匪茶則病憊立至而我之借以控制生番者在茶於是乎互市之名處之而善公私可得數十萬金此非取之於

民而加之賦者也自權法者失化裁推移之意坐失厚利釀成弊穴可嘆也愼引目時秤驗謹關防重委官廣餘茶嚴互市憲典司存也然首尾畢舉而後可以言令舉之而遺其細末焉猶夫弊也甚哉權之難行也曷爲愼引目也鹽法之引司徒令甲也其通塞多寡會典移案俱載也自越渡賂放而後有無引之茶自冒給影射而後有無茶之引無引之茶人所知也無茶之引則奸人乘機冒給買窩於遠商至數十千百張證驗之難而易於作弊也今下令曰某月日開種聚四方之商而審其年貌籍貫填內號以付秤驗之官給外號以備官津盤詰取寄住里鄰店戶之結以防入山影射不行退繳盡所開之數量多寡而均給之芽茶十之七葉茶十之三區畫引價比舊或少增焉持之恆久冒濫可絕矣曷爲時秤驗也秤驗之不時奸弊之必滋語曰事久生奸以此今聚數百艘鱗次水濱而後請官請之數日而後差官差之數十日而後臨按推托展轉比蒞事且數月矣背負撐駕私竊趨利者可勝計哉今下令曰始十月朔終明年三月晦茶船以次抵嘉定比其至石馬也巡司具數達委官所委官卽黑水尾挨幫秤驗立票照放辰而至午而行

移時畢事如法處分過期不及期者懲之以法奸利何從而生哉曷爲  
謹關防也嘉定三江自越巂來者曰沫江自雅州來者曰青衣江自瀘  
口來者曰錦江三江合流中有州曰黑水尾古之黑水尾秤掣批驗所  
也青衣江與沫江合曰觀音灘由灘而上曰浮橋口勝國時造舟爲梁  
而扁鑰之茶船由黑水尾驗訖則啓浮梁橋放行至慎重也今船泊漁  
村則已近浮梁口矣何所關防乎江河變遷浮梁不可作黑水尾尙存  
也不於此地秤驗已失扼吭之機矣今下令曰茶船至石馬星馳呈報  
所司於黑水尾秤驗如法押送漁村轉發雅州交易沿途防範越渡私  
帶者律設以法影射私竊勢不相及矣曷爲重委官也處脂膏不能自  
潤者有幾利之所在義士視之如醜毒貪夫視之如旨酒弄文法壞典  
章墮官箴輔之以狙獪之徒詭祕尤甚鮮有不中其機者於涼作法且  
恐其渝而可不慎哉今下令曰所轄卽府佐若州縣正官初任精敏廉  
能懋著可期逮到者撫巡會委一人以十月至嘉定弛張先後一切付  
之事竣返任不負委托者明揚之卽九江蕪湖荊州臨清歲權不過萬  
金猶攝以主事一人欽依差遣而秤驗者苟得其人歲可入數萬金矣